

PERBANYAKKAN SEDEKAH DALAM RAMADAN

6 Ramadan 1443H/8 April 2022M

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ
سَيِّئَاتِ أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ.
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ.
اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ،
فَيَا عِبَادَ اللَّهِ، اتَّقُوا اللَّهَ وَأُوصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita berusaha meningkatkan keimanan dan ketakwaan kepada Allah Subhanahu wa Taala dengan melaksanakan segala suruhan dan menjauhi segala larangan-Nya. Mudah-mudahan kita peroleh keampunan di dunia dan akhirat.

Sidang Jumaat yang dirahmati Allah Subhanahu wa Taala.

Bulan Ramadan adalah peluang bagi setiap orang Islam mengumpul sebanyak-banyak pahala. Salah satu amalan yang mudah dan besar ganjarannya dalam bulan Ramadan ini adalah amalan bersedekah. Bersedekah ertinya membelanjakan

sebahagian daripada rezeki yang dikurniakan oleh Allah Subhanahu wa Taala kepada kita untuk diberikan kepada golongan yang memerlukan. Contohnya bersedekah kepada fakir miskin, anak yatim, masjid, badan-badan kebajikan, madrasah-madrasah, golongan penuntut ilmu dan sebagainya. Allah Subhanahu wa Taala berfirman dalam Surah al-Munafiqun ayat 10:

أَعُوذُ بِاللَّهِ مِنَ الشَّيْطَانِ الرَّجِيمِ

وَأَنْفِقُوا مِنْ مَّا رَزَقْنَاكُمْ مِنْ قَبْلِ أَنْ يَأْتِيَ أَحَدَكُمُ الْمَوْتُ فَيَقُولَ رَبِّ

لَوْلَا أَخَّرْتَنِي إِلَىٰ أَجَلٍ قَرِيبٍ فَأَصَّدَّقَ وَأَكُن مِنَ الصَّالِحِينَ ﴿١٠﴾

Yang bermaksud: *“Dan belanjakanlah sebahagian daripada apa yang telah Kami rezekikan kepadamu sebelum datang kematian kepada salah seorang antara kamu; lalu ia berkata: "Wahai Tuhanku, mengapa Engkau tidak menangguhkan (kematian)ku sampai waktu yang dekat, yang menyebabkan aku dapat bersedekah dan aku termasuk dalam kalangan orang yang soleh?"*

Ayat ini menggambarkan bahawa orang yang mati bercita-cita supaya dapat hidup kembali untuk bersedekah kerana mengetahui besarnya fadilat bersedekah tersebut. Ingatlah, selagi

kita masih hidup ini, marilah kita memperbanyakkan sedekah walaupun kita bukanlah orang kaya. Ada orang berangan-angan hendak bersedekah banyak-banyak apabila sudah jadi orang kaya nanti. Sebenarnya, sesiapa jua sama ada kaya mahupun miskin boleh bersedekah, asalkan hati kita ikhlas. Rasulullah Sallallahu Alaihi Wasallam bersabda dalam sebuah hadis yang diriwayatkan oleh Imam Ahmad:

اتَّقُوا النَّارَ وَلَوْ بِشِقِّ تَمْرَةٍ

Yang bermaksud: *“Takutlah kamu kepada neraka walau hanya dengan bersedekah sebelah biji kurma.”*

Harta yang kita miliki di dunia ini sama ada banyak ataupun sedikit bukanlah milik kita semuanya. Di situ ada bahagian orang lain. Sebagai orang yang beriman, kita dianjurkan untuk sentiasa mengamalkan prinsip ‘*taawun*’ yakni bantu-membantu terutamanya kepada saudara-saudara seagama kita yang kurang berkemampuan atau yang ditimpa musibah. Selain itu, amalan bersedekah juga adalah salah satu jalan untuk kita menghapuskan dosa-dosa seperti mana sabda Rasulullah Sallallahu Alaihi Wasallam dalam sebuah hadis yang diriwayatkan oleh Imam al-Tirmidzi:

الصَّدَقَةُ تُطْفِئُ الْخَطِيئَةَ كَمَا يُطْفِئُ الْمَاءُ النَّارَ

Yang bermaksud: *“Sedekah dapat menghapus dosa sepertimana air memadamkan api.”*

Sidang Jumaat yang dirahmati Allah Subhanahu wa Taala.

Marilah kita mengambil peluang sepanjang bulan Ramadan ini untuk kita melipatgandakan pahala dengan amalan bersedekah. Ringankan tangan kita untuk memasukkan sumbangan wang ringgit ke dalam tabung-tabung masjid seberapa ikhlas yang boleh. Setidak-tidaknya, dengan sumbangan kita itu dapatlah pihak masjid menampung perbelanjaan bil air dan elektrik pada setiap bulan atau menjalankan aktiviti-aktiviti pengimaran masjid. Pada bulan Ramadan ini juga, amatlah besar pahalanya jika kita dapat menyumbang wang ringgit atau makanan untuk tujuan berbuka puasa. Semoga dengan sedekah yang kita hulurkan, hidup kita akan bertambah keberkatan umur serta menyembuhkan penyakit dan menyelamatkan kita daripada musibah.

أَعُوذُ بِاللَّهِ مِنَ الشَّيْطَانِ الرَّجِيمِ
 إِنْ تُبَدُّوا الصَّدَقَاتِ فَنِعِمَّا هِيَ وَإِنْ تُخْفُوهَا وَتُؤْتُوهَا الْفُقَرَاءَ
 فَهُوَ خَيْرٌ لَكُمْ وَيُكَفِّرُ عَنْكُمْ مِّنْ سَيِّئَاتِكُمْ وَاللَّهُ بِمَا
 تَعْمَلُونَ خَبِيرٌ ﴿٢٧١﴾

Yang bermaksud: “*Jika kamu menampakkan sedekah(mu), maka itu adalah baik sekali. Dan jika kamu menyembunyikannya dan kamu berikan kepada golongan fakir, maka menyembunyikan itu lebih baik bagimu. Dan Allah akan menghapuskan daripada kamu sebahagian kesalahan-kesalahanmu; dan Allah mengetahui apa yang kamu kerjakan.*”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ
 وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ
 قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ،
 وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

